

fründ vnd Aydgenossen . die zû vns gehörent vnd sich vnder daz selbe / vnsere Statt Jnsigel mit vns verbunden hând . och gehenkt habint . ze ainer vergicht vnd wâren gezûgnuß Alles des so jn disem obgedachten Bund zwüschent vns baiden teiln beredt gedinget vnd verschriben ist. An All gevârd vnd Arglist. Vnder / daz selb der Statt Jnsigel ze Veltkilch . Wir vorgeanten Burgherren. des ersten ze Ramschwâg⁸ ze Tosters⁹ ze der Alten Montfort.¹⁴ ze der Nûwen Montfort.¹⁶ Vnd ze fûssach¹⁷ vnd dâr zû alle die lût die zû denselben vestinen gehörent / es sigint Amptlût ald ander lût. Vnd dârnâch der landamman ze Rankwil vnd alle die lût denen er von sins Amptz wegen da ze gebietet hât Wa die sesshafft ald wonhafft sint. dârnâch der keller ze hochst vnd alle die / lût die jn den selben kelnhof gehörent. dârnâch der Amman vnd die lût gemainlich ze Dôrrenbûren ze Stiglingen²⁰ vnd ze knûwen²¹ Vnd darzû mit namen alle die lût die jn der Gegnû von Getzis hinab zwüschent dem Rin / vnd der fûssach sesshafft vnd wonhafft sint. Sunderlich die och zû der herrschafft gen Veltkilch gehörent als vr ist beschaiden. Vns och alle gemainlich willeklich vnd Vesteklich verbunden habint vnd bindent Alles des so hie vor / geschriben stât vnd mit worten beschaiden erlûht vnd begriffen ist An all gevârd. Des selben alles Wir obgedachten Wallser all gemainlich. Wa wir jn der herrschafft von Veltkilch gebirgen gericht Twingen vnd Bânnen / sesshafft vnd wônhafft sigint. es sig jn Tumûlls¹² jn Glatterns¹³ ald anderswâ. vns och willeklich vnd vesteklich verbunden habint vnd bindent vnder dero von Veltkilch jnsigel fûr vns vnd All vnsere nâchkomen. dârnâch so habint / Wir obgeanten Bregentzerwalder vnsers gemainen landes jnsigel och fûr vnsere gûten fründ vnd nâchgeburen. die von Stôffen²⁴ vnd langenegger²³ och offentlich gehenkt an die obgedachten Buntbrief / baid ze ainer vergicht vnd gantzen Wârhait Aller vorgeschribner ding. dârvnder wir die selben von Stôffen.²⁴ der Amman vnd die lût da gemainlich vnd och die lût gemainlich an der langenegger²³ vns och willeklich vnd vesteklich ver- / bunden habint vnd bindent. des obgedachten Bundes vnd aller vorgeschribner ding mit vrkûnde dis offenn gegenwûrtigen briefs. Der ze Veltkilch geben Wart. des jâres do man zalt von Cristes gebûrte drûzehenhundert / Vnd jm Ainen vnd Nûntzgosten Jâr. An dem nâchsten fritag nâch vnsere lieben frowen tag ze ogsten . / .